

ତିମତି ନିକଟକୁ ପ୍ରେରିତ ପାଉଲଙ୍କ ପର୍ଯ୍ୟନ୍ତ ପତ୍ର ତିମତି ଲାଗାଂ ପକ୍ୟାତି ପାଉଲ୍‌ତି ପର୍ତ୍ତୁମ୍ ଆକି ପର୍ତ୍ତୁମ୍ ତିମତି ପତି ବିସ୍ତେ ପାଦେକ୍

ପର୍ତ୍ତୁମ୍ ତିମତି ପତି ର ଆକି, ପକ୍ୟାତି ପାଉଲ୍‌ତାଂ ତା ତେଲ୍ଲା ତିମତିଂ ଲେକା ଆତାଡ଼ନ୍ନା । ପର୍ତ୍ତୁମ୍ ତିମତି ଆଜି ମାନଗାନାଡ଼ ୬୨-୬୪ କ୍ରିଷ୍ଟତି ଜଲମ୍ ପାଚେ ଲେକା ଆତାଡ଼ନ୍ନା । ଆଜି ମାନଗାନାଡ଼ ଇଦାଂ ଆଜି ମାନଗାନାଡ଼ ପାଉଲ୍‌ତି ଜିବୁନ୍‌ନି ହାରିହାରା ସମୁ ଆନାଡ଼ । ପାଉଲ୍‌ତି ହାଙ୍ଗଦାକାନ୍ ତିମତି ବେସି ମେହାଣ୍ ମାଚାଡ଼, ହେଝାନ୍ ବେସି ଝେଡ଼ାଲିଂ ତିମତିଂ ମାଜି ଇଞ୍ଜି ଇଞ୍ଜି ମାଚାନ୍ ପିଲିପିୟ ୨:୨୨ ଓ ତିମତି ୧:୨୧:୧୮ । ଇଦାଂ ପାଉଲ୍‌ତି ହୁଦାଂ ଲେକାତି ଚାରି ଗଟା ନିଜାର ଅଲ୍ଲଗା ପତିଂ ବିତ୍ତେ ଇଦାଂ ରଞ୍ଜାଙ୍ଗ୍ ଇମେତାକେ କି ମଣ୍ଡୁଲି ପିସ୍ତୁ ରଞ୍ଜାନ୍ ମୁଣିକାତି ଜାଣା କିନାନ୍ । ବିନ୍ ତିନ୍‌ଗଟା ପତିଂ ଜେତି ତିମତି, ତିତସ୍, ଆରି ପିଲିମନ୍ ଆନାଡ଼ । ପର୍ତ୍ତୁମ୍ ତିମତି ମଣ୍ଡୁଲିନି ଆଦେକ୍ ହେବା କିନି ଦାରା ବିସ୍ତେ ମାନାଡ଼ ୨:୧-୫ । ଇବେ ମଣ୍ଡୁଲିନି ନେତାର୍‌ତି ସାଲ୍ଲି ବିସ୍ତେ ହୁଡ଼୍‌ନାସ୍ ୩:୧-୧୩ ଆରି ମିର୍ ଗୁରୁର୍‌ତି ବିରୁଦ୍‌ତ ଜାଗ୍ରତ୍ ଇନାକା ମନାଡ଼ ୧:୩-୧୧୪:୧-୫୬:୨-୫ ମଣ୍ଡୁଲି ବିତ୍ତେ ତିମତି ଇନେସ୍ ବାନି ରଞ୍ଜାନ୍ ନେତା ଆନି ଲଡ଼ା ହେଦାଂ ପାଉଲ୍ ହିକ୍ୟା ହିନି ବିସ୍ତେ ଚଦନାନ୍ । ପର୍ତ୍ତୁମ୍ ତିମତିତ ନଂନି ନାଚିନି ମଣ୍ଡୁଲିନି କାମାୟ୍ ଚାଲାୟ୍‌କିନି କାଜିଂ ମା ଜୁଗ୍‌ନି ମଣ୍ଡୁଲିନି ନେତାରିଂ ଆଦିକ୍ ବେସି ମୁଡ଼୍‌ହପ୍‌ନାକା ଆହ୍‌ନାଡ଼ ।

୧ ତିମତି ପତି ବିସ୍ତେନି ରାହାଣ୍

- ୧ ପାଉଲ୍ ତିମତିଂ ବାଦାୟ୍ କିଜି ଲେକା ହାଙ୍ଗ୍‌ତାନ୍ନା । ୧:୧-୨
- ୨ ପାଉଲ୍ ତିମତିଂ ମିର୍ ଗୁରୁର୍ ବିରୁଦ୍‌ତ ଜାଗ୍ରତ୍ କିନାନ୍ । ୧:୩-୧୧
- ୩ କ୍ରିଷ୍ଟତାକେ ପାଉଲ୍‌ତି ଝାରିକିଜି ଆକି ଲେକି କିତାନ୍ । ୧:୧୨-୧୯

୪ ପାଉଲ୍ ମଣ୍ଡଲିନି ହେବାକାମାୟ ଆରି ନେତାର୍ତ୍ତ ବିସ୍ତେ ତିମତିଠି ଟାଣ୍ଡନାନ୍ । ୨:୩

୫ ପାଉଲ୍ ତିମତିଠି ଏଚେଗଟା ହାରିହାରା ଟାଣ୍ଡି ଲେକା ଓସ୍ତାନ୍ । ୪:୭

୧ ଆନ୍ ପାଉଲ୍, ମାଙ୍ଗ ମୁକ୍ତିକିଦ୍ଦି ଇସ୍ପୁର୍ ଆରି ବାସ୍ନି ଆହା କ୍ରିଷ୍ଟ ଜିସୁଙ୍ଗ୍ ବଲ୍ ଇସାପ୍ରେ କ୍ରିଷ୍ଟ ଜିସୁତି ରଖାନ୍ ପକ୍ୟାତାକାନ୍, ୨ ଯାତ୍ ତ ଜାର ଦରମ୍ ମାଜି ତିମତି ଲାଗାଠି ଆକି ଲେକିକିନାଙ୍ଗା, ଆବା ଇସ୍ପୁର୍ ଆରି ମା ମାପୁ କ୍ରିଷ୍ଟ ଜିସୁତାଠି ଉପକାର୍, ଦୟା, ଆରି ସୁସ୍ତା ମି କାଜିଠି ଆଏଡ୍ ।

ବୁଲ୍‌କାୟକିନି ହିକ୍ୟା କାଜିଠି ଜାଗ୍ରତ୍

୩ ଆନ୍ ମାକିଦନିଆତ ହାନିହିଙ୍ଗ୍ ନିଙ୍ଗେଙ୍ଗ୍ ଇନେସ୍‌କି ଗଞ୍ଜାରି କିଜି ମାନ୍‌ଟାଙ୍ଗ୍, ହେ ଲାକେ ଏପେଙ୍ଗ୍ ଏପିସିତ ମାନାଟ୍ । ହେବେ କେତେଜାଣ୍ ବୁଲ୍ ହିକ୍ୟା ହିନାରା । ହେଞ୍ଜାରିଠି ବନ୍ଦ୍ କିୟାଟ୍ ଇନାଟ୍ । ୪ କି ହାନ୍ଦାୟ କାତା ଆରି ଓଜ୍‌ଓଜ୍ ଲାତ୍ରାତ୍ ମାନ୍‌ଦ୍ୟାନ୍ କିଉର୍, ଇଦାଠି କାଜିଠି ହେଞ୍ଜାରିଠି ବଲ୍ ହିୟାଟ୍; ହେ ଓଜ୍ ପାତ୍ ବିସ୍ତେ ଇସ୍ପୁର୍‌ତି କାମାୟନି ଉପକାର୍ ଆଞ୍ଜାଦାଙ୍ଗ୍ ନଲେ ଜିକାଟାଣା ଉଦ୍‌ଜାୟ୍ କିନାଡ୍ । ୫ ମାତର୍ ହାର୍ଦି ମାନ୍, ସକଟ୍ ବାବ୍‌ନା ଆରି କାପ୍‌ଟିୟା ପାତ୍ ତାଠି ହତ୍‌ତି ଇମ୍‌ଣି ଜିଉନନାକା, ଜାଗ୍ରତ୍ କିଦେଠି ଆନ୍ ଇ ହିକ୍ୟା ହିନାଙ୍ଗା । ୬ ହେଦାଠି ମସାତି ବିଦିନି ଇସାବ୍ ଆନାଡ୍; ଇନେ ଇନେର୍ ଇସ୍‌ବୁ ବିସ୍ତେ କାଜିଠି ଇଟ୍‌କାଡ୍ ହୁଡ୍‌ଞ୍ଜାଦାଙ୍ଗ୍ ଆହାର୍ କାତାତ ଆହା ଆଜି ହାଜି ବାଣାନାରା । ୭ ହେଞ୍ଜାର୍ ବିଦିତ ଗୁରୁ ଆଦେଙ୍ଗ୍ ଇଟା କିତାର୍, ମାତର୍ ଇମ୍‌ଣି ବିସ୍ତେ ଆଟ୍‌ଞ୍ଜା ହିକ୍ୟା ହିନାର୍, ହେଦାଠି ନିଜେ ବୁଜାଆଉର୍ ।

୮ ଆପ୍ ପୁନାପ୍ ଜେ, ବିଦି ସମାନ୍ ବାବ୍ରେ ପାଲି କିତିସ୍, ହେଦାଠି ହାର୍ । ୯ ମାତର୍ ବିଦି ଅଦାମ୍ ଆରି ପାପିୟା, ବିଗାଡ୍ ଆରି ଦୟା ହିଲ୍‌ଞ୍ଜାକାନ୍, ଆବାଙ୍ଗ୍ ଅହ୍‌ନାକାନ୍ ଆରି ଆୟାଙ୍ଗ୍ ଅହ୍‌ନାକାନ୍, ନାର୍‌ଅହ୍‌ନାକାନ୍, ଦାରି, ମୁଟିଈଡିନାକାନ୍, ମାନାୟ୍ ଚର୍, ମିଟ୍ ଇନାକାର୍ ଆରି ମିଟ୍ ପାର୍‌ମାଣ୍ କିନାକାର୍ କାଜିଠି, ଆରେ ହାର୍‌ଦି ହିକ୍ୟାନି ଉଲ୍‌ଟା ଜେ ଇମ୍‌ଣାକା ବିସ୍ତେ ମାନାଡ୍ ହେଦାଠି କାଜିଠି ଜେ

☆ ୧:୨ ୧:୨ ପକ୍ୟାତାକା ୧୭:୧.

ସମାନ ଆତାନ୍ନା, ୧୦ ଇଦାଂ ପୁନଃ ଜଦି ଇନେର ବିଦିନି ହାରଦି
ବେବାର କିନାନ୍, ତେବେ ହେଦାଂ ଜେ ହାରଦାକା, ଇଦାଂ ଆପ୍
ପୁନାପ୍, ୧୧ ଇଦାଂ ତ ନା ତାକେ ହେଲ୍ଲାଇୟ କିୟାତାତନା ହାରଦାକା
ଦନ୍ୟ ଇସ୍ତ ଜାଜ୍‌ମାଲ୍ ନେକ୍ରିକାବୁର୍ ସୁଣାୟ କିନି ହିକ୍ୟା ହୁକେ
ଆନାତ୍ ।

ଇସ୍ତ ଦୟା କାଜିଂ ଜୁଆର୍

୧୨ ମାଦାଙ୍ଗ୍ ଇମଣି ମାପୁ କ୍ରିସ୍ଟ ଜିସୁ ନାଙ୍ଗେଙ୍ଗ୍ ସାକ୍ତି ହିତ୍‌ତାନନା,
ତାଙ୍ଗେଙ୍ଗ୍ ଆନ୍ ଜୁଆର୍ କିନାଙ୍ଗା ଜେ, ହେୱାନ୍ ନାଙ୍ଗେଙ୍ଗ୍ ପାତ୍
କିଜି ହେବାକାରୟା ପାଦ୍‌ତ ବାତି କିତ୍‌ତାନନା, ୧୩ ଆତିସ୍‌ପା ଆନ୍
ଆଗେ ନିନ୍ଦାନିକାଙ୍ଗ୍, କସୁହିନାକାନ୍ ଆରି ହର୍‌ବରକିନାକାଂ ମାଚାଂ;
ମାତର୍ ଆନ୍ ପାତ୍ କିୱାକା ହୁକେ ଗିଆନ୍ ହିଲ୍‌ଝି ଲାକେ ହେଦାଂ
କିଜି ମାଚାଙ୍ଗ୍ ଇଞ୍ଜି ଦୟା ପାୟାତାଙ୍ଗ୍; ୧୪ ଆରେ, ମା ମାପୁତି ଦୟା
କ୍ରିସ୍ଟ ଜିସୁତି ଲାହାଙ୍ଗ୍ ପାତ୍ ଆରି ଜିତନନାକା ହୁଦାଂ ନା କାଜିଂ ବେସି
ଆତାତ୍; ୧୫ ପାପିୟାରିଙ୍ଗ୍ ମୁକ୍ତି କିନି କାଜିଂ କ୍ରିସ୍ଟ ଜିସୁ ଜେ ପୁତ୍
ଜୁଡ୍‌ତାନ୍, ଇ କାତା ପାତ୍ ଆରି ଇଟ୍‌ୟାନିଜଗ୍; ହେ ପାପିୟାର୍
ବିତ୍ରେତାଂ ଆନ୍ ମୁଡ୍‌ଦାକାଂ । ୧୬ ଆତିସ୍‌ପା ଇମ୍‌ଣାକାର୍ ଖାନିଦିତ୍ତ
କାଡ୍‌ଦ ଝିଜ୍‌ଝି ଜିବୁନ୍ ପାୟା ଆନି କାଜିଂ ଜିସୁ କ୍ରିସ୍ଟତାକେ ପାତ୍
କିତାର୍, ହେୱାର୍ ତାକେ ଉତ୍‌ରମୁଡ୍ ଲାକେ ଆନି କାଜିଂ ମୁଡ୍‌ଦି
ପାପିୟା ଜେ ଆନ୍, ନା ତାକେ ହେୱାନ୍ ଇନେସ୍‌କି ଜାର୍ ବାତ୍
ଦୟା କିଦ୍‌ନାନ୍, ଇଦାଂ କାଜିଂ ଆନ୍ ଦୟା ପାୟା ଆତାଂ । ୧୭ ଜିରାଝି,
ଚଞ୍ଜିୟାଆଝି, ରୱାନ୍ ମତର୍ ଇସ୍‌ବର୍ ଜେ ଝିଜ୍‌ଝି କାଡ୍‌ନି ରାଜା, ତା
ପାଣ୍ ଆରି ଜାଜ୍‌ମାଲ୍ ଜୁଗ୍ ଜୁଗ୍ ଆଏଡ୍ । ଆମେନ୍ ।

୧୮ ଏ କାଡ୍‌ଦେ ତିମତି, ନି ବିସ୍ତେ ପୁର୍ବେ ଇ ଝିଜୁ
ବେଶ୍‌ବାକ୍‌ଶାୟକିନି ହୁଦାଂ ଆନ୍ ନିଙ୍ଗେଙ୍ଗ୍ ଇ ବଲ୍ ହିଦ୍‌ନାଙ୍ଗା,
ଇନେସ୍‌କି ଏପେଙ୍ଗ୍ ହେ ସବୁ ବେଶ୍‌ବାକ୍‌ଶାୟକିନାକା ଉପକାର୍‌ତାଂ
ହାରଦାଂ ଜୁଜ୍ କିଦେଙ୍ଗ୍ ଆଡ୍‌ନାଦେର୍; ୧୯ ପାତ୍ ଆରି ହାରଦି
ଚିନ୍ତା ସାକ୍ତି ଆସ୍ତି ଇଗାଟ୍; ହେଦାଂ ପିସ୍ତିଲେ କେତେଜାଣତି ପାତ୍
ବାଙ୍ଗାଆତାତ୍; ୨୦ ହେୱାର୍ ବିତ୍ରେତାଂ ହୁମନାୟ ଆରି ଆଲେକ୍‌ଜାଣ୍ଟର୍

ରିକାର୍; ଇଞ୍ଜାର ଇନେସ୍ ସାସନ୍ ପାୟା ଆଜି ଇସ୍ବର ନିନ୍ଦା କିଉର୍, ଇଦାଂ କାଜିଂ ଆନ୍ ଇଞ୍ଜାରିଙ୍ଗ୍ ସୟତାନ୍ କେଇଦ ହେଲାଇୟ କିତାଂ ।

୨

ମଣ୍ଡଳିତ ପାର୍ତନା କିନି ବିଦି

୧ ଆନ୍ ପର୍ତୁମ୍ ଗଞ୍ଜାରି କିନାଙ୍ଗ୍, ପାର୍ତନା କିନିଞ୍ଜେଡ଼ାଂ ଓଜାର୍ କାଜିଂ ଇସ୍ବରତି ତାକେ ପାର୍ତନା କିୟାଟ୍, ପାର୍ତନା, ଗଞ୍ଜାରି, ଦନ୍ୟବାଦ୍ ଞ୍ଜେଟାଟ୍ । ୨ ବିନ୍‌ବିନ୍ ରାଜା ଆରି ସାସନ୍‌କାରିୟା ଆରେ ସବୁ ସାଦୁର୍ କାଜିଂ ଇସ୍ବରତିଂ ପାର୍ତନା, ଗଞ୍ଜାରି ଆରି ଦନ୍ୟବାଦ୍ ଜାଣାୟ୍ କିନାଦେର୍, ଆପେଂ ଇନେସ୍ ଇସ୍ବର ଦିୟାନ୍ତ ପାଣ୍ଡା ଆଉପ୍ ଆରି ବିନେନିକାର୍ କାଜିଂ ସବୁଞ୍ଜେଡ଼ାଙ୍ଗ୍ ସୁକ୍ ସୁସ୍ତାତ ଜିରୁନ୍ ଜିପକା କିଦେଙ୍ଗ୍ ଆଡ୍‌ନାପ୍ । ୩ ଇ ବାନି ପାର୍ତନା ମା ମୁକ୍ତି କିଡ୍‌ତାକାନ୍ ଇସ୍ବତ୍ କାଣ୍‌କୃତ ହାର୍ ଆରି ଇଟ୍ୟାନାକା । ୪ ଓଜାର୍ ଇନେସ୍ ମୁକ୍ତି ଆନାର୍ ଆରି ହାଡ୍‌ପା ବିସ୍ତେ ଗିୟାନ୍ ପାୟା ଆନାର୍, ଇଦାଂ ହେଞ୍ଜାନ୍ ମାନ୍ କିନାନ୍ । ୫ ଇନାକିଦେଂକି ରଞ୍ଜାନ୍ ମତର୍ ଇସ୍ବର ମାନାନ୍, ଆରେ ଇସ୍ବର ଆରି ମାନାୟାର୍ ବିତ୍ତେ ରଞ୍ଜାନ୍ ମତର୍ ମାଦ୍‌ଶାକାନ୍ ମାନାନ୍, ହେଞ୍ଜାନ୍ ଆନାନା ମାନାୟ୍ ଜିସୁ କ୍ରିସ୍ଟୁ: ୬ ଜିସୁ ଓଜାକାତ୍ ମୁକ୍ତାନି ମଲ୍ ଲାକେ ଜାର୍‌ତିଙ୍ଗ୍ ଦାନ୍ କିଜି ସମାନ୍ ଖାଡ଼ାଲିଙ୍ଗ୍ ହେବେନି ସାକି ହିତାନ୍‌ନା । ୭ ✨ହେଦାଂ କାଜିଂ ଆନେଙ୍ଗ୍ ରଞ୍ଜାଙ୍ଗ୍ ସୁଣାୟ୍ କିନାକାଙ୍ଗ୍, ପକ୍ୟାତାକାନ୍, ଆରେ ପାତ୍ ଆରି ସଡ୍ ବିସ୍ତେ ପାତ୍ କିଞ୍ଜି ଜିହୁଦିର୍‌ତ ରଞ୍ଜାଙ୍ଗ୍ ଗୁରୁ ଲାକେ ବାଟିକିୟା ଆତାଂନା, ଆନ୍ ହାଡ୍‌ପା ଇଞ୍ଜନାଙ୍ଗା, ମିର୍ ଇଞ୍ଜୁଙ୍ଗା ।

୮ ଆନ୍ ଇଚା କିତିସ୍ ଜେ ପାର୍ତନାତ ପୁଇପୁୟା କେଇ ଲାମାୟ୍ କିଜି ଓଜାର୍ ମାନାୟାର୍ ପାର୍ତନା କିଏର୍, ମାନ୍ତ ଓଜୁ ବାନି କାକ୍ତି ଆରି ତାରାନାକା ପିହାଟ୍ । ୯ ✨ହେ ଲାକେ ପା କର୍‌ଲେ ହିମ୍‌ଶାକାଂ କହାବଲିଂ ଗାଟ୍‌ମେକ୍ ଆରି ହନା କି ମୁକ୍ତା କି ଦାମ୍‌ନି ହେନ୍ଦାତ ଜାର୍ ଜାର୍‌ତିଂ ଗାଡ଼ିକିଞ୍ଜାଦାଂ ଲାଜ୍ ଆରି ହାର୍‌ଦି ବୁଦି ହୁକେ, ଜାଗ୍ରତ୍ କିଜି ଉସ୍‌ପାଟ୍ ୧୦ ହାର୍‌ଦି କାମାୟ୍ କାଜିଂ ଜାର୍‌ତି ଦାମ୍‌

କଗ୍‌ଲେକ୍‌କାଂ ଲଡ଼ାନି ହାତ୍‌ପା କାମାୟ ଲାକେ ରଞ୍ଜି ଜାର୍ ଜାର୍‌ତିଂ
 ରଞ୍ଜାଟ୍ । ^{୧୧} କଗ୍‌ଲେ ବାତ୍ ତଲ୍ୟା ମାନି କିଜି ଚିମରାଆଜି ହିକ୍ୟା
 ଇଚେଡ୍ । ^{୧୨} ଆନ୍ କଗ୍‌ଲେକ୍ ହିକ୍ୟାହିଦେକ୍ କି ଆଣ୍ଟେନ୍ ଜପି
 ରାଜ୍ କିଦେକ୍ ଆଦିକାର୍ ହିଉକ୍ ମାତର୍ ହେଦେଲ୍ ମଦା ଆଜି
 ଝେନେଡ୍ । ^{୧୩} ଇନେକିଦେଂକି ପର୍ତ୍ତୁମ୍ ଆଦମ୍ ଉବ୍‌ଜାତାନ୍ ତାପାଚେ
 ହବା । ^{୧୪} ଆରେ ଆଦମ୍ ଟକ୍‌ଆଜି ମାନ୍‌ଝାଦାଂ ମାତାନ୍, ମାତର୍
 କଗ୍‌ଲେ ଟକ୍‌ତ ଆଜି ବଲ୍ ମାନିକିଝାଦାଂ ଦସ୍‌ତ ଦସି ଆତାଡ୍ ।
^{୧୫} ମାତର୍ କଗ୍‌ଲେକ୍ ହାର୍‌ଦିବୁଦି ଲାହାକ୍ ପାତ୍, ଜିଉନନାକା
 ଆରି ପୁଇପୁୟାତାଂ ତିର୍ ମାତିସ୍, ହେଦେଲ୍ ହିମ୍‌ଶା ଜଲମ୍ କିନି
 ସମ୍‌ତ ମୁକ୍ତି ପାୟା ଆନାଡ୍ ।

୩

ମଣ୍ଡୁଲି ତାକେ ଚାଲାୟ୍ କିନାକା

^୧ ଇ କାତା ସଡ୍, ଇନେନ୍ ଜଦି ମୁଣିକା ପାଦ୍ ଦାଇଡ୍ ଆଦେକ୍
 ଇଚା କିନାନ୍, ଲାଗିଂ ହେଝାନ୍ ହାର୍ କାମାୟ ମାନ୍ କିଏନ୍ । ^୨ *ଲାଗିଂ,
 ମୁଣିକାତି ଦସିଆଝାଦାଂ ମାନାକା ମାନାଡ୍ ହେଝାନ୍ ଆତିସ୍ ର ତକ୍‌ନି
 ଡକ୍‌, ଜାର୍‌ତିଂ ସମାଲି କିନାକା, ହାର୍‌ଦିବୁଦି, ସବୁଝେଡାକ୍, ଏଚେକ୍
 ଝାରିତ ଆରି ହିକ୍ୟାଦାନ୍‌ତ ବାତ୍ ଆନାର୍, ^୩ ମଦ୍‌ଝା କି କୁରୁଲିୟା
 ଆଝାଦାକ୍ ଇଚିସ୍ ଦାମ୍ ମତର୍ ସୁସ୍ତା, ହୁଦାର୍, ବେରୁଆଝାଦାଂ,
 ଆରି ଦନ୍ ଲବ୍‌ ଆଉନ୍ । ^୪ ଜାର୍ କୁରୁମ୍‌ତିକ୍ ହାର୍ ଲାକେ ଜାତୁନ୍
 କିନାନ୍, ତା ହିମ୍‌ଶାକାଂ ହିକ୍ୟା କିଜି ମାନାନ୍ । ^୫ ଇନେନ୍ ଇନାଝାତାକ୍
 ଜାର୍ କୁରୁମ୍‌ତିଂ ଚାଲାୟ୍ କିଦେକ୍ ପୁନାନ୍, ହେଝାନ୍ ଇନେସ୍ ଇସ୍‌ତ୍
 ମଣ୍ଡୁଲିତିଂ ଜାତୁନ୍ କିଦେଂ ଆଡ୍‌ନାନ୍ ? ^୬ ହେଝାନ୍ ପାତ୍ ତ ହେନ୍‌ଚି
 ମାନାକା ମାନାଡ୍; ପୁନି ପାତ୍ କିନାକାନ୍ ଆଝାଦାକ୍ ମାନାନ୍,
 ଏଚେକାଡ୍‌ଦ ଆହାର୍ ଗାବ୍ ଆଜି ସୟ୍‌ତାନ୍ ଲାକେ ତାଣ୍ ପାୟା
 ଆନାନ୍ । ^୭ ହେଝାନ୍ତି ପା ବାତ୍ ଲକୁ ତାକ୍ ସନ୍‌ମାନ୍ ପାୟାନାକା
 ଲଡା, ମାନାଡ୍, ଏଚେକାଡ୍‌ଦ ହେଝାନ୍ ନିୟା ପାୟା ଆଜି ସୟ୍‌ତାନ୍‌ନି
 ଡକ୍‌ତ ହେଜେନାନ୍ ।

* ୩:୭ ୩:୭ ତିତସ୍ ୧:୭-୯.

ମଣ୍ଡଳିନି ହେବାକାର୍ଯ୍ୟ

୮ ହେ ଲାକେ ହେବାକାରିୟାର୍ତ୍ତି, ହାଦର୍ ବାବନାତ ପାତର୍ ନି ଡକ୍ତି ଗିୟାନ୍ ଦାସ୍ତି ସମାନ୍ ବେବାର୍ ତକ୍ଲି ଆଖାଦାଙ୍ଗ୍, ଅଙ୍ଗୁର୍ ରାସ୍ ଉଣାଖାଦାଙ୍ଗ୍ ମାନାନ୍ ଆରି କାମାୟ୍ ଦନ୍ ଲାବ୍ଡି ଆମେର୍; ୯ ମା ଦାରୁମ୍ ପାତର୍ ନି ବେରଣିଂ ହତାକା ହାଡ଼ପାକାଂ ହେଖାର୍ ସକର୍ ଚିନ୍ତା ସାକ୍ତିତାଂ ତାଟ୍ ବାବ୍ରେ ପାତର୍ କିଜି ମାନ୍‌ଗାନାର୍ । ୧୦ ହେଖାର୍ ପା ପର୍ତ୍ତୁମ୍ ପରିକ୍ୟାକିୟା ଆୟେର୍, ଆରେ ଦସି ଆଖାଦାଂ ଚଞ୍ଜିୟା ଆତାନ୍, ହେବାକାର୍ଯ୍ୟା ପାଦତ ବାଚିକିୟାୟେନ୍ । ୧୧ ହେ ଲାକେ କଗ୍‌ଲେକ୍ ପା ଲକାର୍‌ନିୟା ଆଖାଦାଙ୍ଗ୍ କାଲେତାଂ, ମିର୍ ଇନାକାଦେଲ୍ ଆରି ସବୁ ବିସ୍ତେ ପାତର୍ କିନାକାଦେଲ୍ ଆନାକା ମାନାଡ଼ । ୧୨ ହେବା କିନାକାର୍ ର ର କଗ୍‌ଲେନି ଆଣ୍ଡା ଆୟେର୍, ଆରି ଜାର୍ ଜାର୍ ହିମ୍‌ଶାକାଙ୍ଗ୍ ଆରି କୁଟୁମ୍‌ତିଙ୍ଗ୍ ହାର୍ ଲାକେ ଚାଲାୟ୍ କିଏନ୍ । ୧୩ ଇନେକିଦେଂକି ଇନେର୍ ହାର୍ କିଜି ହେବାକାର୍ଯ୍ୟା କାମାୟ୍ କିତାଣ୍ଡା, ହେଖାର୍ ଜାର୍ ଜାର୍ କାଜିଂ ତାକ୍‌ପୁଟାଆଜି ଆରି କ୍ରିଷ୍ଟ ଜିସୁତି ତାକେ ପାତର୍ ହୁଦାଂ ବେସି ସାସ୍ ଲାବ୍ କିତାର୍ ।

ପାତର୍ ନି ହାଡ଼ପା

୧୪ ଇ ଆକି ଲେକିକିନିହିଂ ଆନ୍ ବେଗି ମି ତାକେ ହାନାଙ୍ଗ୍ ଇଞ୍ଜି ଆହା କିନାଙ୍ଗା; ୧୫ ମତର୍ ଏତେକାଡ଼୍‌ଦ ନାଦାଂ ମାଲାଆନାଡ଼, ତେବେ ଇସ୍‌ପତର୍ ଇଞ୍ଜି, ଇଚିସ୍ ହାଡ଼ପାନି ମୁଣ୍ଡା ଆରି ମୁଡ଼କୁନାଦି ଲାକେ ଜିତି ଇସ୍‌ପତର୍ ମଣ୍ଡଳିତ, ଇନେସ୍ ବେବାର୍ କିୟାଆନାଡ଼, ହେଦାଂ ଇନେସ୍ ଏପେଙ୍ଗ୍ ପୁନାଟ୍, ଇଦାଂ କାଜିଂ ଇ ଓଜୁ ମି ଲାଗାଂ ଲେକିକିଦ୍‌ନାଙ୍ଗା । ୧୬ ଇସ୍‌ବ୍ ହେବାକାରି ବିତ୍ରେନି ଅରଡ଼ ଜେ ଗାଜା କାତା ଇଦାଂ ଓଜାର୍ ମାନି କିତାର୍ । ହେଦାଂ ଇ,

କ୍ରିଷ୍ଟ ମାନାୟ୍ ଗାଗାଡ଼୍ ଆଜି ଚଞ୍ଜିୟା ଆତାନ୍, ଜିବୁନ୍‌ତ ଦାମର୍ ଇଞ୍ଜି
ତାକ୍‌ପୁଟାତାନ୍,

ଦୁଡ଼ତକ୍ କାଜିଂ ଚଞ୍ଜିୟାତାନ୍,

ଜାତିର୍ ବିତ୍ରେ ସୁଣାୟ୍ କିୟାତାନ୍, ପାଣ୍ଡତ ଇନ୍‌ଧାତାନ୍ ।

ପୁତର୍ ତ ପାତର୍ କିୟାଆଜି ଜାଜ୍‌ମାଲ୍‌ତ ରବ୍‌ୟାତାନ୍ ।

୪

ମିଚ୍ ହିକ୍ୟାହିନାକାନ୍

^୧ ପୁରୁପୁୟା ଜିବୁନ୍ ପୁଟ୍‌ତେ ଇଞ୍ଜିନାତା, ପାଚେନି କାଡ଼ଦ ଇନେ ଇନେର୍ ବାନ୍ୟାମାନ୍ ମିଚ୍‌ଝା ଲଗାଙ୍ଗ୍ କୁଟ୍‌କିନିତାକେ, ଚାକ୍ରାୟ୍ ଜିବୁନ୍ କାଜିଂ ଆରି ପୁଦାଙ୍ଗ୍ ହିକ୍ୟା କାଜିଂ ମାନ୍ କିଜି ପାତ୍ ପିହନାର୍; ^୨ ଇଝାର୍ କେଡ଼ଜାଣ୍ ଚାକ୍ରାୟ୍ ଆରି କୁଟ୍ ଆନାର୍ ହେଝାର୍ ଚିନ୍ତା ସାଲ୍ଲିତ ହାତାକାର୍ । ^୩ ହେ ମିଚ୍‌ଝାର୍ ବିବାଆନାକା ମୁନା କିତାର୍, ଆରେ ବାରବିନି କାଦି କାଜିଂ ବିନେ ମାଞ୍ଜେଙ୍ଗ୍ ହିକ୍ୟା ହିନାର୍ । ପାତ୍ ନିକାନ୍ ଆରି ହାଡ଼ପା ପୁନ୍‌ଞ୍ଜି ମାନି ମାନାୟାର୍ ହୁଦାଂ ଦନ୍ୟବାଦ୍ ହୁକେ ଚିଞ୍ଜେଙ୍ଗ୍ କାଜିଂ ଇସ୍‌ବର୍ ଇ ସବୁ ତ ଉବ୍‌ଜାଣ୍ କିତାନ୍‌ନା । ^୪ ଇନେକିଦେଂକି ଇସ୍‌ବର୍ ସବୁ ଉବ୍‌ଜାଣ୍ ଦିନିସ୍ ହାରଦାକା, ଆରେ ଜଝାର୍ ହୁକେ ଅତିସ୍ ଇମ୍‌ଣି ବିସ୍ତେ ଇଟ୍ୟା ଆଉଡ଼, ^୫ ଲାଗିଂ ଇସ୍‌ବର୍ କାତା ଆରି ପାର୍ତ୍ତାନା ହୁଦାଂ ହେଦାଂ ପୁରୁପୁୟା କିୟାଆନାଡ଼ ।

କ୍ରିଷ୍ଟ ଜିସୁଙ୍ଗ୍ ହାରଦି ହେବାକାରୟା

^୬ ଇ ସବୁ ବିସ୍ତେ ଏପେଙ୍ଗ୍ ଟଣ୍ଡାରିଙ୍ଗ୍ ଆରି ତଣ୍ଡାଦେକାଂ ହିକ୍ୟା ହିତିସ୍ କ୍ରିଷ୍ଟ ଜିସୁତି ରଝାନ୍ ହାରଦି ହେବା କିନାକାନ୍ ଆନାନ୍, ଆରେ ଏପେଙ୍ଗ୍ ଇମ୍‌ଣି ପାତ୍ ଆରି ହାରଦି ହିକ୍ୟାତ ଦାସ୍ତି ଝାତାଦେଣ୍ଡା, ହେ ବଚନ୍ ହୁଦାଂ ସାଲ୍ଲି ଆନାଡ଼; ^୭ ଇସ୍‌ବର୍‌ତିଂ ଅଦାମ୍ ଅପ୍‌ମାନ୍ କିଜି ମାନି ମଲ୍‌ହିଲ୍‌ଝି କାତାଂ ପିସ୍ତି, ଦାରୁମ୍ ଜିବୁନ୍‌ତିଂ ବାଡ଼କାସ୍ କିଦେଙ୍ଗ୍ ଅବ୍ୟାସ୍ କିୟାଡ଼ । ^୮ ଇନେକିଦେଂକି ଗାଗାଡ଼ୁନି କ୍ରାସ୍‌ଜି ଅଲ୍‌ପ୍ ବିସ୍ତେ ଲାବ୍‌ଆଦନାଡ଼, ମାତର୍ ଇସ୍‌ବର୍‌ତି ହେବାତ ଇ କାଡ଼ଦାଙ୍ଗ୍ ଆରି ପାଚେକାଡ଼ଦାଙ୍ଗ୍ ପାର୍ମାଣ୍ କିୟା ଆଜି ଝିଜୁ ବିସ୍ତେ ଜିବୁନ୍ ଲାବ୍‌ଆଦନାଡ଼ । ^୯ ଇ ବେରଣ୍ ପାତ୍ ଆରି ସବୁତାକେ ଇଟ୍‌ୟାନିଜଗ୍; ^{୧୦} ଇଦାଂ କାଜିଂ ତ ଆସେଙ୍ଗ୍ କାମାୟ୍ ଆରି ମାନ୍‌ଦ୍ୟାନ୍ କିଜି କସ୍ କିନାସା, ଇନେକିଦେଂକି ଇମ୍‌ଣି ଜିତି ଇସ୍‌ବର୍ ଝିଜୁ ମାନାୟ୍‌ତିଂ ଇତିସ୍ ପାତ୍ କିନାକାରିଂ ମୁକ୍ତି କିନାକାନ୍ତି ହେଝାନ୍ତି ତାକେ ମା ବାସ୍ ମାନାଡ଼ ।

୧୧ ଏପେଙ୍ଗ ଇ ସବୁ ବିସ୍ତେ ବଲ୍ଲ ହିଜି ହେଝାରିଂ ହିକ୍ୟା ହିୟାଟ୍ । ୧୨ ମି ବେଣ୍ଡିୟା ଝାଡ଼ାଙ୍ଗ୍ ଇନେର୍ ମିଙ୍ଗେଙ୍ଗ୍ ପଲ୍ୟା ଇଞ୍ଜମେର୍, ମାତର୍ କାତାତ, ବେବାର୍ଡ, ଜିଉନନିତ, ପାତର୍ ତ ଆରି ପୁଇପୁୟାତ ପାତର୍ କିନାକା ହାର୍ ଉତର୍ମୁଡ୍ ଲାକେ ଆଡୁ । ୧୩ ଆନେଙ୍ଗ୍ ମି ଲାଗାଂ ଝାନି ପାତେକ୍ ସାସ୍ତୁର୍ନି ପାଟ୍, ବୁଜାୟ୍‌କିନାକା ଆରି ହିକ୍ୟାହିନିତାକେ ମାନଦ୍ୟାନ୍ କିୟାଟ୍ । ୧୪ ମାଣ୍ଡୁଲି ବୁଡ଼ାଲୁର୍ ନେତାର୍ ମିଙ୍ଗେଙ୍ଗ୍ ଇସ୍ପୁର୍ତି ଝେନି କିଜି ନି ଜପି କେଇ ଇଟ୍‌ନିହିଂ ଏପ୍ ଇମ୍‌ଣି ମାପୁତି ଦାନ୍ ସାଲ୍ଲି ଲାବ୍ କିଜି ମାଚାଦେର୍, ହେଦେଲିଂ ଏଲାମାଟ୍ । ୧୫ ମି ନିନାକା ଇନେସ୍‌କି ଝିଜାର୍ ତାକେ ହନାଟ୍, ଇଦାଂ କାଜିଂ ଇ ସବୁ ବିସ୍ତେ ମାତ୍ ଇଟାଟ୍, ହେ ଝିଜୁ ତାକେ ଦିଆନ୍ ଆଡୁ । ୧୬ ଜାର୍ ବିସ୍ତେ ଆରି ଜାର୍ ହିକ୍ୟା ବିସ୍ତେ ଜାଗ୍‌ଟ୍ ଆଡୁ, ଇ ସବୁ ବିସ୍ତେ ଲାଗିସ୍ ମାନାଟ୍, ଇନେକିଦେଂକି ହେଦାଂ କିତିସ୍ ଏପେଙ୍ଗ୍ ଜାର୍ ମୁଲ୍ଲି ଆଦେଂ ଆରି ମି ଝେନାକାର୍‌ତି ମୁକ୍‌ଡାୟ୍ କିଦେଙ୍ଗ୍ ପା ଆଡନାଦେର୍ ।

୫

ପାତର୍ କିନାକାର୍ କାଜିଂ କାମାୟ୍ କିନାକା

୧ ଏପେଙ୍ଗ୍ ପ୍ରାଚିନାର୍ ଇନସ୍ତା କିମାଟ୍, ମାତର୍ ତାଙ୍ଗେଙ୍ଗ୍ ଆବା ଇଞ୍ଜି ବାବି ଗଝାରି କିୟାଟ୍; ବେଣ୍ଡିୟାରିଂ ଟଣ୍ଡାର୍ ଲାକେ, ୨ ପ୍ରାଚିନାର୍ କଗ୍‌ଲେକାଂ ଆୟା ଆରି ଜିପଲିକାଂ ପୁଇପୁୟା ବାବ୍ରେ ତଣ୍ଡେଲ୍ ଇଞ୍ଜି ଗିଆନ୍ କିଜି ହେ ଲାକେ ବେବାର୍ କିୟାଟ୍ ।

୩ ଆହ୍‌ର ହିଲ୍‌ଝି ରାଣ୍ଡିକାଂ ଜାତୁନ୍ ଅଝାଟ୍ । ୪ ମାତର୍ ଏଚେକାଡ୍‌ଦ ଇମ୍‌ଣି ରାଣ୍ଡିତ କାଡ୍‌ଦେ ଗାଡ୍‌ଚେ କି ନାତିନାତିଣି ମାଚିସ୍, ବାଟିଙ୍ଗ୍ ହେଝେକ୍ ପର୍ଡୁମ୍ ଜାର୍ କୁଚୁମ୍ କାଜିଂ ବଲ୍ଲି ଚଟ୍‌ଚେଙ୍ଗ୍ ଆରି ଆୟାଆବା କାଜିଂ ଉପ୍‌କାର୍ କିଦେଙ୍ଗ୍ ହିକ୍ୟା କିଏର୍; ଇନେକିଦେଂକି ଇଦାଂ ତ ଇସ୍ପୁର୍ତି କାଣ୍‌କୁତାଂ ହାର୍‌ଇଟ୍ୟା ଆନାର୍ । ୫ ଇମ୍‌ଣି ରାଣ୍ଡି ଆହ୍‌ରହିଲ୍‌ଝାକା ଆନାଟ୍ ଆରି ସାକାହିଲ୍‌ଝାକା, ହେଦେଲ୍ ଇସ୍ପୁର୍ ଜପି ବାସ୍ ଇଡ୍‌ଜି ଝେଡ଼ାନାଣା ଗଝାରି ଲାହାଂ ପାର୍ଡାନାତ ଲାଗିସ୍ ମାନେଟ୍; ୬ ମାତର୍ ଇମ୍‌ଣି ରାଣ୍ଡିକ୍ ସୁକ୍‌ବଗି କିନିକ୍ ଆହା, ହେଝେକ୍ ଜିବୁନ୍ ମାଚିସ୍ତା ହାତିକ୍‌ନା । ୭ ହେଝେକ୍ ଇନେସ୍ ଦସିଆଝାଦାଂ ଆନିକ୍, ଇଦାଂ କାଜିଂ ଇ ସବୁ ପା ହେଝେକାଂ ବଲ୍ଲ ହିୟାଟ୍ । ୮ ମାତର୍

ଜଦି ଇନେର ଜାର୍ ଖାସ୍ତିନି, ବେସିକିଜି ଜାର୍ କୁଚୁମ୍ବିନି ଜାତୁନ୍ ଅଞ୍ଜିତିସ୍, ହେଖାନ୍ ପାତର୍ କିଞ୍ଜାକାର୍ତା ପାତର୍ କିଉନ୍, ଆରେ ହେଖାନ୍ ପାତର୍ କିଞ୍ଜାକାନ୍ତା ଦରମ୍ ହିଲ୍ଲକାନ୍ ଆନାନ୍ ।

୯ ଇମ୍ଫଣି ରାଣ୍ଡିନି ବୈସ୍ ସାଟେ ବାହୁଁ ତାଙ୍ ଉଣା ଆକାୟ୍, ୧୦ ଆରେ ଇଦେଲ୍ ର ଆଣ୍ଡେନ୍ କଗ୍ଲେ ଆରି ହାର୍ଦି ପୁଇପୁୟା କାମାୟ୍ କାଜିଂ ଡାକ୍ପୁଟାଆଜି, ଇଚିସ୍, ହେଦେଲ୍ ଜଦି ହିମ୍ଫଣାକାଙ୍ ପହାକିଜି, ଝିଜାରିଂ ସସ୍, ତେଲ୍ଲାରିଂ ପାନା ନୁଜ୍ନାକା, ଦୁକ୍ଲୁଗାତର୍ ବଜ୍ ପିଣ୍ଡି କିଜି ମାନାଡ୍, ଆରେ ଝିଜୁ ହାଡ଼ପା କାମାୟ୍ତ ତିକ୍ତିକା ଆଜି ମାନାଡ୍, ବାଟିଙ୍ ହେଦେଲ୍ତି ତର ରାଣ୍ଡି ଇଞ୍ଜି ଲେକାଏଡ୍ ।

୧୧ ମାତର ଉଣା ବାହୁଁନି ଜିପଲି ରାଣ୍ଡିକାଂ ପିହାଟ୍, ଇନାକିଦେଂକି ହେଝେକ୍ ବାନ୍ୟାକାମ୍ ଆହାତିଂ ମାନ୍ କିଜି କ୍ରିସ୍ ତାକେନ୍‌ଣ୍ଡାଙ୍ ଏଡା ଆଜି ବିବା କିଦେଙ୍ ଇଟା କିନିକ୍; ୧୨ ହେଝେକ୍ ହେଝେକ୍ତି ଆଗେ ପାର୍ମାଣ୍ ପିହିନି କାଜିଂ ଡାଣ୍ଡପାୟାନ୍ତିକ୍ । ୧୩ ଆରେ ପା ହେଝେକ୍ ଇଲ୍ଲକୁ ଇଲ୍ଲକୁ ବୁଲ୍ଲାଆଜି ଆଡ଼ସିୟା ଆଦେଙ୍ ହିକାଆନ୍ତିକ୍, ଆରେ କେବଲ୍ ଆଡ଼ସିୟା ଆକାୟ୍, ମତର ଆହାର୍ କାତା ଆରି ଲକାର୍ ଗାଣ୍ଡୁ କିଜି ଅରାହିଲ୍‌ଝି କାତାବାର୍ତା କିନିକ୍ ୧୪ ଲାଗିଂ, ନା ଇଟା, ଜିପଲି ରାଣ୍ଡିକ୍ ବିବା ଆୟେକ୍, ହିମ୍ଫଣା ଗାଟାଆୟେକ୍, ଇଲ୍ଲକାମାୟ୍ ତଲ୍ଲାୟ୍‌କିୟେକ୍, ନିୟା କିନି କାଜିଂ ସାଡୁଙ୍ ଇନାକାପା ଉପାୟ୍ ହିମେକ୍; ୧୫ ଇନେକିଦେଂକି ନଙ୍ ପା ଇଦେକ୍ ଇଦେକ୍ କ୍ରିସ୍ତାକେ ଦେହା ଆଜି ସୟ୍ତାନ୍ତି ପାଟେ ହାନିକା । ୧୬ ଜଦି ଇମ୍ଫଣି ପାତର୍ ନିକାଦେଲ୍ କଗ୍ଲେକ୍ ଇଞ୍ଜି ରାଣ୍ଡିକ୍ ମାନିକ୍, ଲାଗିଂ ହେଦେଲ୍ ହେଝେକ୍ତି ଦୁକ୍ ପଚିକିଏକ୍, ଆରେ ମଣ୍ଡଲି ଜପି ବଜ୍ ଆମେଡ୍, ଇନେସକି ମଣ୍ଡଲି ଆହ୍‌ର ହିଲ୍‌ଝି ରାଣ୍ଡିକାଂ ଦୁକ୍ ପଚି କିଦେଙ୍ ଆଡ଼ନାଡ୍ ।

୧୭ ଇମ୍ଫଣି ପ୍ରାଟିନାର୍ ହାର୍ ତାଲ୍ଲାୟ୍ କିତାର୍, ବେସି କିଜି ଇମ୍ଫଣାକାର୍ ବଚନ୍ ପରଟାର୍ ଆରି ହିକାତ କସ୍ କିତାର୍, ହେଝାର୍ ରି ଗୁଣ୍ ଝାରି ପାୟାନ୍ତି ଜଗ୍ ଇଞ୍ଜି ଗାଣା କିୟା ଆନାର୍, ୧୮ ଇନେକିଦେଂକି ଦରମ୍ ସାସ୍ତର ଇନାତା, “ତାସ୍ ତ୍ରେସ୍‌ନି ଝାଡାଂ

☆ ୫:୧୮ ୫:୧୮ ମାତିଉ ୧୦:୧୦; ଲୁକ ୧୦:୭.

ବଲ୍ଲୀ ଖେଇଦ କତ୍ରା ଗାଟ୍‌ମାଟ୍ ।” ଆରେ କାମାୟ୍ କିନାକାନ୍ ଜାର୍ କୁଲି ତାବୁଂ ପାୟାନ୍ ହକ୍ । ୧୯ ରିୟାର୍ କି ତିନ୍‌ଜାଣ୍ ସାକି ପିସ୍‌ସି ଇମ୍‌ଣି ପ୍ରାଚିନାର୍ ବିରୁଡ୍‌ତ କାତା ମାନି କିମାଟ୍ । ୨୦ ମାତର୍ ଇନେର୍ ପାପ କିଜି ମାନାର୍, ହେଝାରିଂ ଖିଜାର୍ ତାକେ କେତାଟ୍, ଇନେସ୍‌କି ଅଲ୍‌ଗା ଲଗୁ ପା ପାଣ୍ଡୁ ଆନାର୍ ।

୨୧ ଇସ୍‌ସ୍‌ରତି ସାକି ଇଡ୍‌ଜି, କ୍ରିଷ୍ଟ ଜିସୁତି ଆରି ବାଚିକିତି ଦୁତକ୍ ମୁମ୍‌ଦ ଆନ୍ ଆଟ୍‌ଝା ଲାକେ ବଲ୍ ହିଦ୍‌ନାଙ୍‌ମା, ଏପେଙ୍‌ ଆଗେନି ଦାରା ମେରା ହୁକେ ଚାଲାଝାଦାଂ ଇ ଖିଜୁ ପାଲି କିୟାଟ୍, ଆରେ, ତାରା ବାବ୍ରେ ଇମ୍‌ଣି କାମାୟ୍ ପା କିମାଟ୍ । ୨୨ ତ୍ରିପକ୍ ଇନେର୍ ଜପି କେଇ ଇଟ୍‌ମାଟ୍, କି ଦସିନିକାର୍ ପାପ୍‌ତ ମେହାଆମାଟ୍; ଜାର୍‌ତିଂ ପୁଇପୁୟା କିଜି ଇଟାଟ୍ ।

୨୩ ଆରେ କେବଲ୍ ଏସୁଙ୍ ଉଣ୍‌ଝାଦାଙ୍ ମି ପଚନି ରଗ୍ ଆରି ନିତ୍ରେ ବେମାର୍ କାଜିଂ ଅଲପ୍ ଅଙ୍ଗୁର୍ ରାସ୍ ଉଣାଟ୍ ।

୨୪ କେତେକ୍ ଜାଣ୍‌ତି ବାନ୍‌ଧା କାମାୟ୍ ଅଲପ୍‌ତିଂ ହନାଟ୍, ହେଝାର୍ ହେଦାଂ କାଜିଂ କରଟ୍‌ନି ମୁମ୍ ମାମ୍ ଆଦେଂ ଆନାଟ୍, ଆରେ କେତେକ୍ ଅପ୍‌ରାଦ୍‌ତି ବେସି ବିଲମ୍‌ତାଂ ଦାରାପଡ଼ା ଆନାର୍ । ୨୫ ହେ ଲାକେ ପା ହାଡ୍‌ପା କାମାୟ୍ ହିଗ୍‌ଦାଙ୍ ହନାଟ୍, ଆରେ ଇନାକା ହଡ୍‌ଡ୍, ହେଦାଂ ଡକ୍‌କ୍‌ତି ଇଟ୍ୟାଜି ମାଞ୍ଜେଙ୍ ଆଡୁଡ୍ ।



୧ କ୍ରିଷ୍ଟୁଙ୍ ପାତ୍ କିନାକାର୍ ଏଚେକ୍ ଲଗୁ ଆଡିୟା ଲାକେ ଜୁଝାଣ୍‌ନି ତାରେନ୍ ମାନାନ୍, ହେଝାର୍ ଜାର୍ ଜାର୍ ହାଉକାରିଙ୍ ଏଚେକ୍ ଲଡାନି ପାୟାନାକା ଜଗ୍ ଇଞ୍ଜି ପୁନାଟ୍, ଇନେସ୍‌କି ଇସ୍‌ସ୍‌ତ୍ ତର୍ ଆରି ହିକ୍ୟାତ ନିନ୍ଦା ଆମେଡ୍ । ୨ ଆରେ ଇମ୍‌ଣାକାର୍ ହାଉକାର୍ ପାତ୍ ନିକାନ୍, ହେଝାର୍ ହେଝାରିଂ ଟଣ୍ଡେନ୍ ଇଞ୍ଜି ବାବି କିଜି ଲାଜ୍ କିମେର୍ ଝାଟିଂ ଆଦିକ୍ ଜତନ୍‌ତାଂ ଉପ୍‌କାର୍‌ତାଂ ହେବା କିଏର୍, ଇନେକିଦେଂକି ଇନେର୍ ହେବା ହୁଦାଂ ଉପ୍‌କାର୍ ଅୟାନାର୍, ହେଝାର୍ ପାତ୍ କିନାର୍ ଆରି ଝାରିନିକାର୍ । ଇ ଖିଜୁ ବିସ୍ରେ ହିକ୍ୟା ଆରି ଉପ୍‌ଦେସ୍ ହିୟାଟ୍ ।

ଚାକ୍‌ରାଇ କିନି ହିକ୍ୟା ଆରେ ହାଡ୍‌ପା ଦନ୍

୩ ଇନେର୍ ଜଦି ବିନ୍ ହିକ୍ୟା ହିଜି ମା ମାପୁ ଜିସୁ କ୍ରିସ୍ତୁ ନେକ୍ରିବେରଣ୍ ବଚନ୍ ଆରି ଇସ୍ପରତି ହୁଦାଁ ହିକ୍ୟା ମାନିକିଉର୍, ୪ ବାଟିଙ୍ଗ୍ ହେଝାନ୍ ଅହାର୍ଗାବ ଆ ଆରି ଗିଆନ୍‌ହିଲ୍‌ଝି, ଆରେ କାତାବାର୍ତ୍ତା ଆରି ଗଣ୍ଡଗଲିଆତ ଲାଗାନାର୍; ହେବେତାଁ ତାରା, କିର, ଲକାର ନିନ୍ଦା, ବାନ୍ୟା ଆନ୍‌ମାନ୍, ୫ ଆରେ ଇନେର୍ ଇସ୍ପର ତାକେ ଲାବ୍ ଉପାୟ୍ ଇଞ୍ଜି ମାନେ କିତାର୍, ଏଲେଙ୍ଗ୍ କାରାପ୍‌ମାନ୍ ଆରି ସତ୍ ପିସ୍ତି ଲକାର୍‌ତି ଦିନକେ ବିରୁଡ୍‌ତ ଜଲମ୍ ଆତାକାର୍ ।

୬ ଦାମ୍ ଲଗୁ ଇନେକିଦେଂକି ତାଦାଁ ଏତେକ୍ ମାନାତ୍, ହେଏତେକ୍ ହେଝାନ୍ ସାରି; ୭ ଇନେକିଦେଂକି ଆସେଙ୍ଗ୍ ଜଗତ୍‌ତ ଇନାକା ତାଝାତାସ୍‌ନା, ଆରେ ଇବେତାଁ ଇନାକାପା ଅଦେଁ ଆଡୁସ୍; ୮ ଲାଗିଁ କାଦି ହେନ୍ଦା ମାଟିସ୍ ମା କାଜିଁ ସାରି । ୯ ମତର ଇନେର୍ ମାଜାନ୍ ଆଦେଙ୍ଗ୍ ଇଟା କିତାର୍, ହେଝାର୍ ପରିକ୍ୟାତ ଆରି ଡକ୍ତାତ, ଆରେ କେତେକ୍ ବାନ୍ତି ବାନ୍ୟାତ ଆରି ଲାସ୍‌ଆରୁଡ୍ ଲାଲ୍‌ସାତାକେ ଆର୍ଣ୍ଣାର୍, ଇଦାଁ ଝିନ୍ତୁ ମାନାୟ୍‌ତିଁ ସବୁ ନାସ୍ ଆରି ବୁତାନି ଲାକେ ହାମ୍‌ଦୁରତ ମୁର୍‌ନାତ୍ । ୧୦ ଇନେକିଦେଂକି ଦାନ୍ ଲବ୍ ଝିନ୍ତୁ ନସ୍‌ନି ଦଲ୍; ଇନେ ଇନେର୍ ହେବେ ଆହା ଆଜି ପାତ୍ ପିସ୍ତି ହାଜି ବାଣାତାଣ୍ଣା, ଆରେ ବେସି ଦୁକ୍‌ତାଁ ଜାର୍ ଜାର୍ ମାନ୍‌ତିଁ ଦୁକ୍ କିତାଣ୍ଣା ।

ହାରିହାରାନ୍ତି ବେରଣ୍

୧୧ ମାତର ଏ ତିମତି ଏନ୍ ରକାୟ୍ ଜିସୁ ଲକୁ, ଏନ୍ ଇ ଝିନ୍ତୁ ତାଙ୍ଗ୍ ହାଲ୍‌ଜି ଦାମ୍, ଇସ୍ପରତାକେ, ପାତ୍, ଜିଉନନିତ, ସାସ୍ ଆରି ହୁଦାର୍‌ନି ପାତେ ସିଦାସାଦା ବାତ୍ ଆଦେଁ ସେସ୍ଟା କିୟା । ୧୨ କ୍ରିସ୍ତୁ ପାତ୍‌ନି ହାଦ୍ କୁର୍‌ତାକେ ମାନ୍‌ପାରାଣ୍ କିୟା, ଝିଜ୍‌ଝି ଜିବୁନ୍ ଆସ୍ତି ଇଟା; ହେଦାଁ କାଜିଁ ତ ଏପେଙ୍ଗ୍ କୁକ୍‌ୟାତାଦେଣ୍ଣା ଆରି ବେସି ସାକିର୍ ମୁମ୍‌ଦ ହାଦ୍ ସାକି ହିତାୟ୍‌ନା । ୧୩ ଝିଜ୍‌ଜାର୍‌ତି ଜିବୁନ୍ ହିଦ୍‌ନି ଇସ୍ପତ୍ ବେଟାନିତ, ଆରେ ପକ୍ତିୟ୍ ପିଲାତତି ମୁମ୍‌ଦ ହାଦ୍ ସାକି ହିଦ୍‌ନାକାନ୍ କ୍ରିସ୍ତୁ ଜିସ୍ତୁତି ବେଟାନିତ ଆନ୍ ନିଙ୍ଗେଙ୍ଗ୍ ବଲ୍ ହିଦ୍‌ନାଙ୍ଗା, ୧୪ ମାପୁ ଜିସୁ କ୍ରିସ୍ତୁତି ଆରେଝାନ୍ତି ପାତେକ୍ ମିଙ୍ଗେଙ୍ଗ୍ ହିୟାଜି ମାନ୍‌ତି

☆ ୬:୧୩ ୬:୧୩ ଜହନ୍ ୧୮:୩୭.

ବଲକୁ ପାତ୍ କିଜି ପାଲି କିୟାଟ୍ । ୧୫ ହେୱାନ ପରମ୍ ଦନ୍ୟ ରୱାନ ମତର୍ ସାସନ୍ କାରୟା, ହେୱାନ ରାଜାର ଜପି ରାଜା ଆରି ମାପୁ ତାଙ୍ ମାପୁ, ୧୬ ଇନେର୍ ରୱାନ ମତର୍ ହାୱାକାନ ଆରି ହାଞ୍ଜେଙ୍ ଅଜଡ୍ଡ ବାହାକିନାକାନ, ଇନେନିଙ୍ ଇମ୍ଣି ମୟେଡ୍ପୁର୍ ଇନାୱାଡାଙ୍ ହୁଡ୍ଡାତାନ୍ନା, କି ହୁଡ୍ଡେଙ୍ ଆଡୁଡ୍, ହେୱାନ ସମାନ୍ ୱାଡାଙ୍ ହେଦାଂ ରଦ୍ନାନ; ୱିଜ୍ଝିକାଡ୍ ପାତେକ୍ ହେୱାନ୍ତି ମାନିନି ଆରି ସାକ୍ତିକାଟାକାନ ହୱେଡ୍ । ଆମେନ୍ ।

୧୭ ଇମ୍ଣାକାର ଇ କାଡ୍ଡ ମାଜାନ, ହେୱାର୍ ଇନେସ୍ କି ଆକ୍ରିୟା ଆମେର୍ ଆରି ୱିଜ୍ଝି ଦାନ ଜପି ବାସ୍ କିମେର୍, ଇଚିସ୍ ଦୁକ୍ବଗ୍ କାଜିଂ ସବୁ ବିସ୍ତେ ବେସିତାଂ ମାଙ୍ ଦାନ କିଦ୍ନାନ ଇମ୍ଣି ଇସ୍ପର୍, ହେୱାନ୍ତି ଜପି ବାସ୍ କିନାର୍; ତା ପାତେ ବଗିକିଦେଂ ମା ସବୁ ବିସ୍ତେ ହେୱାନ ମାଙ୍ଜେଙ୍ ହିଦ୍ନାନ । ୧୮ ଆରେ ବିନ୍ ଲକାର୍ ବାଗ୍ କିଜି ୱିଜ୍ଝି ହାର୍ କାମାୟତ ମାଜାନ ଆନାର୍; ଆରେ ମେଲା କେଇଦାଂ ଆରି ଉଦାର୍ ବାଗ୍ ଦାନ କିନାର୍, ଇଦାଂ କାଜିଂ ହେୱାରିଂ ବଲ୍ ହିୟାଟ୍; ୧୯ ତା ଆତିସ୍, ଇ ଅବିନସର୍ ଟୁଣ୍ଡି ଉବ୍ଜାୟ କିଜି ଜାର୍ଡି ପାତେନି କାଜିଂ ହେୱାର୍ ଆଟ୍଱ା କୁନାଦି ରଦ୍ନାର୍ ଆରି ହାରିହାରା ହେୱାର୍ ହାଡ୍ପାନି ଜିବୁନ୍ ଲାବ୍ କିତାର୍ ।

୨୦ ଏ ଡିମ୍ବି, ନି ତାକେ ଇନାକା ହିୟା ଆଡ୍ଡାଡ୍ନା, ହେଦାଂ ରାକ୍ୟା କିୟା; ଆହାର୍ ଜାକ୍ଡା ଆରି ବେଣ୍ ବେଣ୍ଡ “ଗିୟାନ୍ନି” ଜିକାଟାଣାତାଂ ବିନେ ଆଡୁ ।

୨୧ ଇନେ ଇନେର୍ ହେଦାଂ ପାଲି କିୱାଦାଂ ପାତ୍ ବିସ୍ତେ ହାଜିବାଣା ଆତାଣ୍ଡା ।

ଇସ୍ପର୍ଡି ଉପକାର୍ ଆରି ଦୟା ମିଙ୍ଗେଙ୍ ସମାନ୍ବାଡ୍ ଆୟେଡ୍ । ଆମେନ୍ ।

ସତ୍ ବଚନ
The New Testament in the Pengo language of India:
ସତ୍ ବଚନ

copyright © 2020 The Word for the World International

Language: Pengu (Pengo)

Contributor: The Word for the World International

ସତ୍ ବଚନ
ପୁନି ନିର୍ମାଣ , 2020

The New Testament in Pengo Language.

The Word for the World International

This translation is made available to you under the terms of the Creative Commons Attribution license 4.0.

You may share and redistribute this Bible translation or extracts from it in any format, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2023-04-13

PDF generated using Haiola and XeLaTeX on 13 Jul 2024 from source files dated 14 Apr 2023

347138c8-2363-58d9-a1b0-0259691b7d43